

nes Barones de Dacre, & Barones de Say & Zele.

**Aulre.** Pedredus hic limosam planitiem persecans in Septentriones contendit per *Langport* mercatum non infrequentem, & *Aulre* ex tuguriolis paucis viculum, qui melioris notæ oppidum fuisse videtur. Cum enim Alfredus Danos ita prælio fregisset, & obsessos ad deditioem subegisset, ut juraverint se quamprimum ex suis ditionibus cessuros, & *Godrus* eorum Rex Christianitatem, ut inquit Asserius, subire promiserit: illum hoc in loco magna pompa de sacro regenerationis fonte levavit.

**Wellington.** Hinc ab Occasu *Thonum* fluvium recipit Pedredus, qui longe in occidua agri parte, proxime Devoniam exortus latissimos perstringit agros per *Wellington* defluens, quæ Edwardi senioris tempore terra *sex erat Manentium*, quando ille una cum *Lediard*, quæ duodecim erat *Manentium* **Lediard.** Shirburnensi Episcopo concederet. Nunc mercatorium est oppidulum, cui maximo honori ejus est incola, vir honoratissimus (nec enim viri virtute illustres, & de patria optime meriti silentio involvendi) *Ioannes Popham*, ut antiqua generis nobilitate, ita & summa justitia & singulari industria. Qui summus in Regio Tribunali Iustitarius tanta æquabilitate, & tam salutari severitate justitiam administrat, ut tranquillitatem & securitatem domesticam illi magna ex parte jamdiu Anglia debuerit.

**Taunton.** Inde leni, modicoque lapsu *Thonton*, vulgo *Taunton* alluit, & nomine donat *Thonus*. Elegans certe oppidum, latissimoque situ, & ut verbo dicam, hujus regionis alter ocellus: ubi Ina Rex Occidentalium Saxonum castrum construxit, quod *Desburgia* ejus uxor solo æquavit, cum *Eadbrictum* Australium Saxonum Regem inde exturbasset, qui jam sui juris fecerat, & tanquam fræno domitæ gentis uteretur. Cum Edwardus Confessor rerum potiretur, *geldabat*, (ut est in Angliæ commentario Censuali) pro *LIII* *hidis*, *Burgenses LXIII* habuit, Episcopus *Wintoniensis* tenuit, ejusque *Placita* ter in anno hic tenebantur. *Iste consuetudines pertinent ad Taunton Burgberiste, latronis, pacis infractio, harnisfare, denarii de Hundret & denarii Sancti Petri circiet, ter in anno tenere placita Episcopi sine admonitione, Profectio in exercitum cum hominibus Episcopi.* Hic circumquaque regio virentibus pratis jucunda, hortensibus deliciis florens, & frequentibus villis spectantium oculis mirum in modum arridet. Inter villas autem nominatissima sunt *Orchard*, quæ olim ejus nominis habuit Dominos, à quibus ad *Portmannos* ex Equestri ordine hæreditario descendit, *Hach-Beauchamp*, & *Cory-Mallet* à Dominis facta adjunctione. Hæc enim sedes erat *Malletorum* è Normannico genere, à quibus brevi tempore per feminam ad *Pointzios* devenit. E quibus regnante Edwardo Primo, Hugo inter Barones Parlamentarios censebatur, & ex ea familia nonnulli magno splendore & equestri dignitate supersunt. *Beauchampi* autem illi sive de *Belle-campo* magnis honoris ornamentis claruerunt à temporibus regis Henrici Secundi, præcipue ex quo *Cecilia* de *Fortibus* quæ à Comitibus de *Ferrariis*, & magno illo Angliæ Marescallo *Guilielmo* Comite *Pembrochiæ* genus duxit in hanc familiam enupta

fuit. Verum regnante Edwardo tertio, per sorores hæreditas inter Rog. de *S. Mauro*, sive *Seimor*, & *I. Meriet*, qui viri veteris erant profapia & multarum imaginum, dispersita fuit. Hinc erat quod *Henricus Octavus* cum duxisset *Iannam Seimor* matrem Regis Edwardi VI, Edwardum *Seimor* ejus fratrem titulo Vicecomitis *Beauchamp* donaverit, quem Edwardus sextus honore Ducis *Somerfetti* postea illustravit.

Inde qua *Thonus* Pedredo se insinuat, insulam amicam efficit *Aethelinge* olim dictam, id est, *Nobilium insula*, nunc vulgo *Athelney*, quæ non minus *Alfredi* regis latebris nobis nota, cum jam Danus omnia permisceret, quam *Italibus* *Minturnensium* paludes *Marii* latibulo. Regi enim illi (ut Poëta antiquus de ipso cecinit)

————— *Mixta dolori*

*Gaudia semper erant, spes semper mixta timori.*

*Si modo victor erat, ad crastina bella padebat,*

*Si modo victus erat, ad crastina bella parabat.*

*Cui vestes sudore jugi cui sica cruore*

*Tincta jugi, quantum sit onus regnare probarunt.*

Et percommodum sane erat hæc insula latibulum. Stagnantibus utique aquis, & refusionibus inaccessa est (quas Latino Saxonico vocabulo *Gronnas* Asserius dixit) *Pontem olim habuit inter duas arces ab Ælfredo constructas, alnetum etiam permaximum capris & feris plenum, sed solidam terram vix duobus jugeribus latam: cui imposuit ille monasterium: cujus (Malmesburiensem, non me audis) machinam totam quatuor postes solo infixi suspenderunt, quatuor cancellis opere spherico in circuitu ductis.* Non longe ab hac collectis aquis solitarius Pedredus pererravit, sed alterum ab Ortu *focium* rivum accipit, qui *Somerton* præterfluit, olim *primarium* *Comitatus* oppidum, utpote quod nomen fecit. Castrum Regum *West-Saxonie* habuit, quod perruptis muris *Ethelbaldus Merciorum* Rex occupavit; nunc vero *vincentibus* annis ita cessit, ut omnino disparuerit, & oppidum vix nomen tueretur, nisi ex foro *Boario*, quod à *Festo* *Palmarum* ad medium *Junium* frequentissimum habet, vicini enim rei pecuariae inprimis student.

Hoc suscepto fluvio, Pedredus oppidum magnum, & incolis refertum petit, quod *Bridgewater* vulgo vocitamus, nomenque à ponte, & aqua invenisse creditur; sed refragantur *Chartæ* antiquæ, in quibus semper *Burg Walteri* diserte appellatur, & conjectura probabili, à *Waltero de Duaco*, qui *Guilielmo* Conquæstori militavit, & multa prædia ab ipso in hoc agro accepit. Nec alio nomine in donatione illa vocatur qua *Fulco Paynell* Dominus de *Bampton* loci possessionem *Guilielmo* de *Brisver* contulit, ad colligendâ ejus gratiam, qui gratia plurimum apud Regem *Richardum* Primum valuit. Hujus *Guilielmi* filius eodem nomine, cum firmandi castri licentiam fecisset *Ioannes* Rex, castellum hic posuit jam tempore evictum; pontemque incepit, quem *Trivet* è *Cornubia* nobilis immensis sumptibus perfecit. Cum vero *Guilielmus* de *Brisver* junior sine prole diem clausisset, in familia *herciscunda* obtigit *Margaretæ* sorori, per cujus filiam ex *Guilielmo* De *La fert* in familiam de *Cadurcis*, sive *Caworth* devenit, & ab ea hæreditario ad *Duces*

Lan-